

晚

晴

移

詩

匯

晚晴移詩匯卷六十目錄

徐本 三首

張廷璐 十首

黃鴻中 一首

曹源郊 一首

王懋竑 三首

李根雲 一首

金以成 二首

厲鶚 四十五首

萬邦榮 八首

田同之 七首

魯之裕 四首

許廷鑠 十首

金虞 三首

劉文炳 二首

于始瞻 一首

朱續京 二首

于東昶 五首

鄭相如 一首

李國梁 三首

晚晴籀詩匯卷六十

徐世昌

徐本字立人一字是齋錢塘人康熙戊戌進士改庶吉士授編修官至東閣大學士贈少傅諡文穆

恭和 御製落葉詩

曾爲春歸悵落紅那堪綠蔭又飄空飛來遠嶂隨寒雁散
入清谿逐斷蓬茗淪林間吹活火貝書壇畔帶秋風遙從
碧宇丹霄望片片餘霞掩映中

策策商飈氣候殊凋零萬木亦斯須句留不住羣芳歇繫
戀渾忘一物無荒徑夕陽聞踏馬空山殘月靜唳烏李將
軍畫傳烘染傍屋依檐列數株

恭和 御製柳絮詩

輕似吳絲薄似霜相依靜院與閒堂
添將挂衲僧衣輒引得穿花蝶翅狂
無力只緣清露重有情還逐野雲忙
但空結習無留滯任點春衣總未妨

張廷璐字寶臣號藥齋桐城人康熙戊戌一甲二名進士授編修官至禮部侍郎有詠花軒詩集

詩話藥齋爲文和弟詩多清麗典文和體格相近意
境閒曠絕句尤勝其和文和元夕寄詩云九霄明月
滿輪初退食歸來且自如火樹星橋春爛漫先生方
擁百城居良宵清景應無比宸宇祥風較若何莫訝
黃扉人澹靜十年紫禁未徵歌能傳出燕處超然之意

曉過玉簫橋

沙路初乾宿雨晴
輒紅不動氣尤清
水風吹綠雙橋接
疏柳陰中款段行

水氣空濛曙色開
觚稜金碧望成堆
仙山樓閣雲光裏
曾

見營邱畫本來

煙柳風蒲水一涯
紅妝臨鏡豔明霞
露華猶白晨光動
開徧瀛州萬朵花

先公有浮山詩因憶舊游散步原韻

金谷巖西種茶處

巖空一綫天
煙雲自迴翔
穹碑屹千仞
奇幻不可量
金石更軒豁
萬木環蒼蒼
天風發清籟
傾耳聆瑤簧
秋深霜樹丹縱目
雲錦張金佛
丈六身青鳥
棲其傍
山僧未脫俗
法海空津梁
苦憶種茶處
徘徊聞古香

陸子巖前竹下

會聖多勝蹟
幽窅景益奇
霜皮挺老樹
女蘿相蔽虧
蕭蕭青琅玕
古澹絕世姿
疏影蕩微風
湘波泛漣漪
徒存高衲

出山余言四卷之二
一
偈剩有名賢詩九帶尋遺踪峭壁空厓屢長松落子聲如
聞仙人棋空明浩嘯廊想像跣趺時蛻骨體自輕世人那
得知

指月石

繞雲百級梯指月一片石乾坤怪未了雷半窗句往往見奇跡
蓮華宛朱青天池湛虛白了無斧鑿痕斯理耐尋繹曠覽
林莽間窅然入深碧俯仰天地寬變幻煙雲積瑤草近可
尋誰是餐霞客

石龍峰松下

何年巨靈掌鞭石作蒼龍鱗鬣自起伏天矯成橫峯環以
澄碧泉蔭以偃蓋松仙人自來去誰能躡其蹤寒濤響清
巖排蕩千芙蓉何當成獨往九節扶孤筇

響雪廊

修廊雲錦麗澗水桃花香張公留遺踪丹井依平岡寒泉
激危石響雪奔飛梁谿喧心愈靜炎蒸有餘涼杳靄散雲
影澄碧涵天光煙林互蒼莽幽邃安可量別來歲月適結
想徒茫茫

滄浪亭

滄浪亭畔柳如絲小板紅橋枕碧漪千載風流成歇絕居
人惟說漫堂祠

雨餘涼氣入生衣夏木陰陰罨翠微欲覓石棋枰在否夕
陽惟見鷺鷥飛

黃鴻中字仲宣號容堂卽墨人康熙戊戌進士改庶吉
士授編修歷官侍讀學士有容堂集

詩話容堂素方嚴與同縣楊仲玉周仲愷皆以端亮
古處爲鄉人所重號卽墨三仲舉於鄉年已五十有
二又七年始成進士世宗憐其晚達
超擢學士出督湖南學政遽卒於官

題堯年叔水交山莊

路隨流水入門對最高峯葉落千山雨泉鳴五夜鐘欲眠
時枕石閒坐爲聽松也有喧闐處秋蟬與壁蛩

曹源郊字尹東一字石麟號東牧嘉善人康熙戊戌進

士改庶吉士授編修有古香閣集

詩話東牧爲蓼懷少宰子少負才名工詩古文辭丙
午典試粵東榜未發疾作卒於闈所居賜硯堂宅餘
隙地擅池石之勝植桂百十株名曰桂圃
當卽景標題得二十詠一時和者甚眾

東園產芝秋暑未能往觀先成一律柬二兄

步屨山巖日夕宜精神相感產神芝種分仙圃三枝秀氣
合靈機五色奇石上盤根雲作護溪邊映彩玉爲姿明朝

擬約來相訪可許瓊漿啜一匙

王懋竑字予中號白田寶應人康熙戊戌進士官安慶

教授特擢編修直上書房有白田詩文集

詩話白田深於程朱之學所著朱子年譜考異最稱精審雍正中蔡文勤薦之特授館職授皇子經可稱稽古榮遇

書座右

長隄潰蟻穴君子慎其微生平操持力不敵一念非波浪
浮天闊潏潏決四圍內省增歎息已往安可追
奔馬不可馭盤石不可幹是非反掌間鉛刀貴一割我心
似寒灰百念俱刊剗願更塞其端絕之在由枿

校禮記注

聖王遺跡付飛煙收拾流傳幾歷年后戴別分曲臺傳皇

熊初爲鄭公箋欲將宋槧填遺字更擬唐碑校昔賢卻怪
後人輕正義衛陳俗說競紛然

李根雲字仙蟠號亦人雲南趙州人康熙戊戌進士改
庶吉士授檢討歷官江西驛鹽道

與鄭樂山劉子定同年暨家弟西園給諫游豐臺

誰家亭館接城陰藥嶼花園次第深十里馬蹏千疊翠一
時草色五湖心斜陽欲暮遲高樹薄酒微醺費短吟誰是
三生唐杜牧春來常有客愁侵

金以成字素存號補山會稽人康熙戊戌進士改庶吉

士授編修歷官兗州知府有補山詩存

詩話補山詩每以書卷掩其性情未第時以百韻投
漁洋漁洋謂詩家上乘全存妙悟貽以所訂唐賢三
味集補山私論漁洋詩境止於王孟杜之北征韓之
南山豈是一味妙悟者蓋補山沈酣典籍固以學力

勝也

出都作

四庫橫陳足老饕南魚豈比北徐高
座中客笑羊公鶴帳底人窺魏武刀
到處啖名如畫餅幾番檢韻失題餽
翠光零落炎州冷重爲山雞惜羽毛

長江和友人韻

岷峨一注溼天根禹力疏排信有神
水氣升騰朝日月灘痕明滅認冬春
螭磯北望山如繡牛渚東來瀉作銀
多少帆檣爭利涉憑君指點斗間頻

厲鶚字太鴻號樊榭錢塘人康熙庚子舉人乾隆丙辰舉博學鴻詞有樊榭山房集

杭大宗曰太鴻詩精深華妙裁斷眾流自新城長水盛行一時海內操觚者莫不乞靈於兩家太鴻獨矯

之以孤澹用意既超徵材尤博吾鄉稱詩於宋元之
後未之或過也沈歸愚曰樊榭徵士學問淹洽尤
熟精兩宋典故實人無敢難者詩亦清高五言在劉
虛常建之間今浙西談藝家專以創擬摭拾為樊榭
流派失樊榭之真矣王蘭泉曰徵君詩幽新雋妙
刻琢研鍊五言尤勝大抵取法陶謝及王孟韋柳而
別有自得之趣瑩然清宵然而遠擷宋詩之精詣
而去其疏蕪時沈文慤方以漢魏盛唐倡吳下莫能
相掩也翁覃谿曰樊榭以精細之思
得韻得味正亦從書卷中醞釀得來
詩話樊榭性情孤峭所作幽秀絕塵思筆出於宋人
而不失唐人之情韻故能於王朱之外自闢蹊徑翁
覃谿錢韓石並有評本多取其酣足渾成之作洵為
知言必至是韻味始足非淺學所能效顰絕句最所
擅長論詞論印
諸作並稱絕調

曉登韜光絕頂

入山已三日登頓遂眞賞霜磴滑難踐陽崖曦乍晃穿漏
深竹光冷翠引孤往冥搜滅眾聞百泉同一響薇谷境盡
幽躋顛矚始爽小閣俯江湖目極但莽蒼坐深香出院青

靄落池上永懷白侍郎願言脫塵鞅

過宋通問副使朱公少章墓

突兀殘碑立古阡行人猶記紹興年青衣已見君王辱白
髮何期使節旋老淚冰天他日恨遺聞曲洧至今傳一抔
築並花宮地夕唄晨鐘更惘然

虎阜卽事

塔迴廊迴燕燕飛送春人去戀斜暉似嫌桮碯侵羅襪卻
要殘紅作地衣

宿永興寺德公山樓

昏黑山雨歇一徑松煙蒙微聞梅花氣吹落疏磬中詎惜
衣履溼宿處投支公憑樓答人語迴與雲際同少選沈靄
斂俯聽幽林風明星忽三五挂在殿角東短燭照春綠夜

靜山逾空觀河悟眾象拂石期冥鴻神清了無夢亂壑流
何窮焚香以達曙茲焉悅微躬

永興寺二雪堂曉起看綠萼梅是馮具區先生手種
幽人先鳥起林磻正寂然是時春空霽山翠爭便娟的的
花間雨澹澹花上煙煙雨爲合離花態亦變遷祭酒昔游
此手種猶生前傲兀根倚石敲倒葉映泉微馨委陳跡高
格同枯禪儒官罷亦得不廢招隱篇攀花久延佇世已無
其賢

溪上巢泉上作

翫溪遂窮源東峯屢向背朝日上我衣春泉淨可愛不知
泉落處潺潺竹籬內喧聞雨疊瀉靜見一潭匯松風颺纖
碧花影蓄深黛名言猶有相幻照乃無悔悠然巢居心頗

欲終年對

晚入石人塢還永興寺

撥蘿尋微徑山意黯將暮幽討忘體疲窈窕入深塢激籟
不通人踏石凡屢渡返景忽難留蒼蒼目爭赴萬竹皆爲
風千花并成霧去鳥有遺音歸樵詎同趣夕梵懷信宿春
溪延緩步入門不生月仍倚檐際樹

春寒

漫脫春衣浣酒紅江南三月最多風梨花雪後酴醾雪人
在重簾淺夢中

重游洞霄宮探大滌洞天

振衣浴罷體更輕竹枝投石聲彭觥空山昨夜龍洗窟雨
過萬壑泉縱橫山靈知我有默禱故遣松風作前導一峯

陰見一峯晴天柱中央翠於掃元同先生昔隱居洞天長
鎖琅函書前游日夕未曾到恨身不得乘飈車穿盡幽篁
履苔石驚見谿訝洞門坼童子曾爲擣藥禽桃花解笑題
詩客此中日月停兩丸想像九夏尤清寒微明秉炬觸暗
壁古靈題字來尋看玲瓏乳竇隔凡處路接華陽不歸去
有人問我洞中來爲說浮雲如柳絮

沈大匡先生華山草堂

心跡竟沈淪空山闕古春亭留唐野史名在宋逋臣破壁
全題字雙松一作薪惟應千載上愧煞瘦腰人

和余葭白題唐子畏畫韓熙載夜宴圖

韓郎自是江北人避地去作江南臣更從江南到江北便
道江南有人憶歸來笑擁名花叢疏眉小面居當中千枝

銀燭照舞影滿堂賓客看驚鴻門生解事執樂句燕支拍
碎聲穿空酣嬉跌宕君莫笑一半桃李無春風宮中唱念
家山破燒槽哀怨傳何窮聊將羣婢汗名檢此意未必聞
重瞳六如居士不並時何由戶外三更窺筆底故有嬀與
施我不見畫但見詩詩工直疑畫遜之眼飽鉛黛嘲貧兒
從來裴休說法爲人願不妨衲衣乞食隨歌姬

趙筠谷買得樂安長公主小玉印出以相示予定其
爲明光宗女熹宗時所稱皇八妹者因賦長歌

揚州塵土日紛紛玉氣市中爲白雲前朝貴主風流遠認
得藍田小篆文瑤華裁向瑤階底母姓便娟本穠李淚灑
龍髯一月餘移宮倉卒驚羅綺忠臣豈肯爲身圖帝姬入
井知羣誣亟封康如託遺訓誰令國柄歸閹奴雲鬟扒角

年猶小親見乾清尊趙嬈須臾委鬼共銷亡信王握璽瞻
天表初下銀河織女機盈盈十五已勝衣粉侯纔習膠宮
禮便許吹簫出禁闈賢聲戚畹流傳寡江墩無勞讓婚者
賜花更得日兄憐投瓊特敕行杯罍愛學江南淺淡妝脂
田水碓厭豪強刻成小印柔荑撫鈴記居然寶繪堂鐘漏
相催歲華擲一枝紅墜悲秦客朱纁冷落橋紐昏不共金
箱殉梅額萬年誅德未足哀賊騎蹴踏都城摧壯哉都尉
又死國碧血滴到珠襦灰青匳玩物今猶在無用摩挲博
人愛爲君試續學古編惆悵蟲鏤非千年

二月十九日同耕民間步東郊晚眺沙河

雨多常禁足及此出郊看風力暄猶勁天容霽始寬波神
青櫟廟田祖白茅壇詎學懷輒俗班春話好官

村舍留人眼魚梁枕水低林長共澄映雲細得端倪山影
鳴榔遠蘆根下柁齊閒心分物色坐待日平西

西湖春雨

遙峯隱見黛眉攢怪底春來無此寒朋比熏鑪風味淺有
人樓上倚闌干。

同丁敬身金質甫陳江皋登寶石山天然圖畫閣
塔下樓開躡級登東風聊憶昔游曾春深城郭渾如畫定
裏鶯花不屬僧人影漸移湖上柳煙光又綠壁間藤留題
爲紀閒蹤跡只有看山詫最能

西溪曉起

首春溪中寒偃卧如屈鐵宵分天柱夢覺來轉清切開門
殘月在下見數峯雪雪際生白雲宵映不可說登橋水市

靜尋徑冰泉裂田翁尙無事初陽候林缺懷新意似欣理
舊抱已結何如巖棲人難竹飯松屑

行田至荆山嶺下作

大小何連延細岑若迴顧中有微徑通兩村隔松霧平疇
開朝日宿麥半疑沍雲根脈未洩涓流但微注野人籬落
小鳴雞隱雜樹雖無汜勝書農話眷幽素稍營下澗業更
羨上洞住竹橋滑春霜往來定非誤

晚秋夜雨有懷故園

落葉卷風雨客愁仍去年背燈三峽水敲枕九江船預想
他時話須妨此夕眠南湖煙翠色應溼草堂前

題冒辟疆姬人金圓玉水墨秋葵圖

辟疆自題云余不能飲日看此

花亦飲醇
酒意也

金瓊橫敬醉不勝墨痕秋暈一匳冰西園老盡佳公子看
畫花枝學信陵

西湖柳枝詞

花草春來斷客魂楊枝只合伴桃根滿湖碧水游船散西
月東風在寺門

鬪盡纖腰一兩枝水仙王廟日斜時青青不許游人折細
葉如顰更泥誰

同吳西林汎舟西溪看梅

緩櫂縱遙目心與春流平邀侶以事解得朋因寡營峯色
煙上霽竹風沙外清一夜叢梅發幾處山窗明香中林鳥
語引我沿溪行積翠點殘雪陰淡寒自生西崦未云夕東
畚方可耕稚子肯迎客花間啟柴荆

曉過福清竹院

探幽勇晨興，靜院鐘未歇。晴煙映竹澄，殘月轉花沒。地僻養靈姿，氛潤蒙玉骨。有如列仙儒，初日晞薜髮。深山留古春，凡豔想易竭。老僧空色相，折取供白佛。護此無盡燈，常依妙香窟。坐聽籬落間，繇羽轉清越。

同吳西林城東看花遇大風戲爲長歌

城南看花誰作羣，好事競造丁隱君。城東看花寂寥耳，相待獨有吳居士。新花破萼初滿叢，沙河浩浩揚天風。已看野渚動平碧，更覺連林搖亂紅。提攜叮嚀羨驥子，出沒葭蘓多漁翁。過橋人似六鷁退，沽酒樽傳三雅空。風光如此肯虛擲，閉戶先生眞可惜。澆花擬向卞公墳，彈絲亦就周家柏。淵明子皙兩達人，天地甯非百年客。有足愛踏三家

村有裾不撇七貴門模糊落日望未已遙山渲出臙脂痕
今朝風起花鞦扇莫使遲來花似霰好將健句當青旛日
日花前一相見

湖樓題壁

水落山寒處盈盈記踏春朱闌今已朽何況倚闌人

漢銅雁足鐙歌爲半槎賦

蒲阪首山青逶迤黃帝鼎成龍胡垂戰且學仙事絕奇茂
陵劉郎始祝釐流傳奕葉敦書詩猶崇祀典倣雲楣妍娥
無姘夕侍祠金釭如虹摻手攜望靈之來月出時神光下
屬風帔帷翩然而逝不可期勞心悄兮煎蛭脂陰精沙麓
祚始衰效祥安得齋房芝後代蛤彩瑩瓊肌不照綠綈方
底兒此鐙行第人見之細數瑤琴彈冰絲銘字儼如沙畫

雖內者嗇夫椽丞今年是竟甯嗟已竟制器尙象古示倣
隨陽有序亦天性銅花涵碧秋水淨雅勝羊頭與鳳柄夜
涼可親宜放鄭千年瓠史寄閒評君家自發短檠詠

夕次石門

望望石門縣秋煙路欲迷村深忘遠近月出辨東西桑影
過橋密蟲聲傍水低吾衰怯風露敢後暝鴉棲

洪熙古刺水歌同全謝山作

哀牢九隆漢所開唐代六詔爭喧豗玉斧畫河段氏立阿
瞿殉節梁王推濠梁真人設郡縣炎徼西南俱革面分司
古刺始羈縻貢琛莽怕旋來見取寶船回恤遠夷萬方輻
輳仁宗時此香不滅芬陀味此水應超蘇合池甲煎百和
花盈缶六一泥封篝火後班衣染麝鑠耳酋珠絡挈餅馬

郎婦熬成細字鐫青銅進入春風生六宮一灑羅衣長不
滅氤氲願與君恩終可憐債帥如香尉購得朱門媚權貴
分宜遺臭塞兩儀當時直壓龍涎氣枕頂餘芳世廟修御
衣小炷純皇留南都譜記春橋顧勛戚方傳恭順侯華胥
舊事無人識流落江南并江北金仙鉛淚一函中夢破香
銷彈不得

浮山禹廟觀山海經塑像三十韻

淮海皆平壤隆然片石支中央居混沌明德鎮阡危不共
羅山合還同息壤遺媼神唐日觀江水漢家祠永永尊文
命湯湯罷怨咨徽形猶帶瘦高棟反如卑柏翳承虛寢狂
章待玉墀風雲生恍惚土木出恢奇憶昔鴻荒遠甯安婦
子熙神姦渾不辨人獸互相欺枯步窮乾粵方祇駭地維

蛇操何蚴蟻鼃抃更躩踞林出刑天舞巖藏貳負尸應龍
飛有翼精衛溺堪悲博物推中壘傳芭望少姨兒坪終古
詫母石至今垂經可百蟲證功堪四載追解裳嗤適裸鑄
鼎訝逢魑定括河圖象徒聞太史疑規摹非近事指點立
多時六月當初降千村走禱祈笙鏞應間作巫覡尙謳思
瓜蔓前年決魚頭萬室爲空紆謁者策屢費大農資呵壁
吾將問褰茭且補瘡牙鬚雄此輩祕怪孰攸司落照明低
塔寒飈響女陴惠之前有塑靖節後無詩沃野居難卜丹
邱到未遲如聽赤絲使歷歷話幽姿

次韻堇浦春日書懷

里社追游每拍肩投簪又是入新年移家幸有琴書共卜
築欣看樹石連不守庚申緣道在偶占甲子得春偏始知

上界多官府今向人間見斥仙

六街堀堞夢纔醒草色何妨滿戶庭
洛下憶曾修禊事淹中帳未了遺經
當簾山月鉤簾見傍枕春潮轉枕聽
此是城南招隱處新詩暇日止重屏

獨坐杉亭簇絳趺看花折簡不煩呼
從無長物稱名士雅有閒情屬固姑
酒畔俳諧編作集墓堂文字積成逋
與君共喜慈顏奉未敢人前號老夫

端居風物際昇平不覺吳霜點鬢生
上冢年光潛委巷趁潮清夢入嚴城
噉齋元是儒林味焚草無勞後世名
有約出郊真興劇柳花如雪愛初晴

錢舜舉摹周昉內人雙陸圖爲梁葑林作

深宮宴起花陰午尙覺春寒入眉嫵
只將握槊當嬉游不

亂窗前白鸚鵡兩人對局如有思寶釵半墮雲鬟敬旁觀
一人憑小婢骰子欲下春蔥遲蠻鞦韆踏地紅鴿背金餅力
挽薔薇水女官未敢促朝妝宿粉殘黃憶濃睡睡濃曾夢
雙陸輪唐家社稷須人扶柘袍又出點籌手樂事可憐同
婦姑畫師著眼非窮相曲眉豐頰當時尙錢郎摹古能逼真
寫出徒令意惆悵豈知絕代佳人住茅屋寒機軋軋無
膏沐

晚由金家堰步至崇先寺

一峯抱花迴不知凡幾里遲日落未落散策從此始石梁
跨澗空苔枝皆倒倚入寺罷晚參僧堂寂如水詰曲取微
徑返景照花裏瀾漫徧巖壑春透無剩蘂乍疑吐佛光白
毫映霞紫復訝妙香生醅醇得禪髓盤桓憩松根結茅擬

來此何必問通波遠尋光福市

西溪山莊有感

闌壓垣衣戶網塵嫩寒惻惻那禁春一池好柴羅裙水只照梅花不照人

魏景初帳構銅歌

霸城月照仙人淚不逐魏宮翁仲二銅駝久作劫灰飛帳構猶存景初字洛靈兒愛芳林好奪得蛾眉供灑掃弭殫想像薄羅風傳與千年尙方造流蘇翠羽光零亂土上出金妖識換文成石馬大討曹水吐玉蜍纔效漢碧筍平坐朱竿密八分應認仲將筆摩挲彷彿陵雲臺小縮波痕勁無匹更聞昭烈能自貶御用都歸銷鉛礮一枝古色出重緘留向人間鑑奢儉

開平王孫種菜歌

高皇初定江南日采石磯頭功第一橫行十萬常將軍帶
礪河山永無失滄桑抱節有賢孫鍾阜秋青入淚痕飄零
大樹不復見傾頤故侯安足論中山同志深閨婦曲折天
吳移舊繡誰知偕隱灌園人俱爲異姓分茅後幾稜荒畦
非賜田晚菰早韭資寒泉可憐一紙鋤奸疏卻裹長街賣
菜錢歸來偃仰棲衡宇猶勝貂蟬興阜伍鳳臺園裏鬼迷
花雞鳴廟前狐嘯雨漫向金陵弔夕曛百年寂寂但孤墳
籬邊尙發東風菜一任空原野火焚

寒柳

酸風無復一枝新憔悴翻疑故態真葉落紛如汴隄雨鴉
棲瘦似灞橋人不將濃影遮游舫猶記斜飄拂舞塵留得

慶奴羅扇子煙痕挽住舊時春

午日淮陰城北觀競渡

此日家家喚艇行一灣野水是新城無人更說防淮事煙柳風蒲到處生

驚飛沙鳥兩相呼鑼鼓綠流引客娛不分午風涼似水爲他兒女颺釵符

誰家林際小園亭過盡豪華物態零幾折虛廊通淺渚壞橋無柱上浮萍

吟朋應是憶天涯舊曲樽前小字斜猶有浴蘭遺俗在晚來閒過賣漿家

晚次陵口

綠徧千村叫杜鵑餘寒猶未脫吳縣暮雲青草夾岡隸春

水小風陵口船舊事六朝殘夢外客程十載夜鐙前白頭
不奈閒愁攪擬向空門問老禪

萬邦榮字仁伯號西田襄城人康熙庚子舉人乾隆丙
辰舉博學鴻詞官莘縣知縣有紅崖詩集

詩話西田少負才名年逾四十始登賢書出蔡禹功
總憲之門會修明史薦充纂修在館三載成列傳十
餘卷總憲罷西田亦乞歸試鴻博又未入選仍用修
史勞出領縣上官甫三月遽卒歸愚探偶感第二章
入別裁集稱其詩格
老幹千尋盡茂枝葉

偶感

葛藟長南山菰蒲生深陂託處既異地彼此焉得知衣裘
偏苦寒茹甘偏苦飢誰念農家老露肘復斷炊人心滄海
深水注無滿時大化原浩浩何事亦參差

世無名與宦人心皆太古世無輪與蹶人皆守鄉土造物

害生成分明設網罟誰能翔天外遠隨黃鵠舉

清江曲

霜清露白秋水淺幾點寒山翠黛遠斜陽兩岸悄無人蘆
荻蕭蕭芙蓉晚欸乃中流搖槳去煙波渺渺知何處沽酒
江樓醉初醒新月已生烏桕樹

東軒

亂編堆竹榻獨樹守柴關屋破紅留日垣低碧見山秋深
園菊老雨後野雲閒無復人來往苔痕滿地斑

商酒務謁程子祠

酒務留遺蹟祠堂對遠峯官卑聊自效道大竟誰容遺像
春風在閒庭花雨濃游楊真有幸函丈日相從

自尉氏至許州道中

路近高陽里家山見一痕行人爭落日疲馬戀孤村堡上
風掀屋人家葉擁門西湖尋故友聊自慰羈魂

西山雜興

無奈中峯未可攀新泥阻我倚柴關春深芳草綠千里雲
斷斜陽紅半山燕舞蹁躚陂水上蝶飛出沒菜花間年年
風物堪人賞不道潛消鏡裏顏

遠扣禪扉暮始還痕留芒履露斑斑雲隨野客同歸岫花
逐流泉亂出山寂歷煙村孤犬吠蕭條祠宇老僧閒開缸
獨酌庭梧下明月無言過碧灣

田同之字硯思別字西圃號小山薑德州人康熙庚子
舉人官國子監學正有硯思集

徐趣園北上過訪

巷僻寡車轍秋風靜掩門狂奴毳毼餘散髮卧竹根故人
走上國過我寒雨軒投我五字詩破我三徑痕相見一相
笑把臂與細論不惜功名薄惟期風雅存殷勤各欣賞茗
熟香鑪溫

將抵繡江望城西一帶

朝從濟上來夕入陽邱路面面翠峯迎脈脈春泉注斜陽
一派紅半是桃花樹

會仙山

東郭一極目望見會仙山仙人在何處霞外空嫋嫋上有
青芝圃下有白雲灣樵牧無蹤跡飛鳥時往還

題吳天章蓮洋集

卅載名聞未相識而今方讀蓮洋詩惟論意表熟梅候盡

得風流登岸時石氣青蒼自如是繭絲黃白將何爲漁洋
別有參同契千點桃花非盡詞漁洋詩話曾載天章門前
萬里崑崙水千點桃花尺
半魚之句

題海右陳人集

水部風流憶昔聞還山春事許誰分平原嶺下遺芳佩十
卦齋頭剩夕曛曾是虞山高品第卻教德水讓清芬一編
今日耽吟賞想像當時孤岳雲

春暮

眼底鶯花節序遷閉門聊自聳吟肩草深三徑綠無賴屋
老一鐙青可憐心事消磨塵硯冷淚痕料理敝衣穿年來
踪跡渾如此睥睨東風益惘然

先祖山薑詩集有句云客來須倩小山薑扶我擁迎

似杖長自注云呼長孫爲小山薑時同之方六齡也今老矣百不如人每一展讀不勝慚痛因敬追

原韻

佳名錫得小山薑七尺曾無一寸長慚愧古歡承硯雨淒涼寒綠襲書香人窮未是緣詩致才薄難言與命妨屈指垂髫今白髮不禁回首淚沾裳

魯之裕字亮儕麻城人康熙庚子舉人歷官直隸清河道有式馨堂詩集

詩話袁簡齋書亮儕摘印事誠不愧奇男子官清河道年已七十餘調制府口析水利數萬言其精能可想詩亦有生氣末可以聲律繩之

詠錦雞

彩羽爭鸞鳳雕籠飫稻粱見珍翻見困語語怨文章

賜金園感賦

賜金園裏百花深，獨客支筇可意尋。
露竹半含春曉淚，雪蕉孤捲歲寒心。
雙溪印月思持鑑，一徑飛泉想沛霖。
尤惜老梅生遠谷，未隨桃李豔芳林。

五溪吟

朝餐洪港開林筍，午酌黔陽出土芹。
一部宮商泉灌石，千層圖畫岫棲雲。
酒帘晚帶江煙動，漁火遙將夜色分。
屈宋不逢山水寂，教人空自挹靈芬。

武當篇

洪濛慘竭青黃力，削鑿欽巖簇鼇極。
芙渠攢矗厚坤心，王子磨針開道域。
明皇奉教靡黃金，範像鎔宮冠絕岑。
斗垣峻級仞十萬，磴道鉤繩凌井參。
足底雲縷互闢闔，巖嶽瀆巖巖。

圻紛纒颯太和元氣鬱氤氲拱揖飛仙承問答振衣一嘯
雷崩轟冉冉梯霞達玉京入宮二觀徧游歷三十六菴羣
送迎勝朝金碧賤於土甌漚琳宮不勝數武當美麗甲寰
中如林豐碣叢荒宇從來不朽唯曰三德功今屬琪園龕
塊間名業露晞日布金匹士隆高談巘原陟降別有以不
向曹溪掬香水質成虞芮尊片言迺畝迺宣迺疆理瞪目
滄桑指一彈銛鋒待截情淵瀾松下竈蛇輕綠骨真人那
在層霄巔

許廷鏐字子遜號竹素長洲人康熙庚子舉人官武平

知縣有竹素園詩存

王蘭泉曰竹素先生詩才綺麗始學杜牧之王仲初
繼而規模何大復徐昌穀志和而節雅七言絕句尤
爲人所傳誦

詩話竹素居官有惠政論事慷慨激發善弓馬刀槊
豪邁自喜歸田後與沈歸愚唱和歸愚序其詩謂吳
中詩學祖宋祧唐竹素大聲疾呼以排之所為詩飛
動凌空有倚馬萬言之概譽之甚至然豪放流於滑
易仍以麗句清辭為合作耳

晚過池上草堂示允武

向晚尋幽人一踏池上路斜陽斂山色波光半含吐羣動
漸已息鳥鳴自相聚歸雲淡無心冥冥集遙樹靜裏悟物
情閒中見天趣相對寂無言輕煙捲如霧清磬隔溪來微
月照歸步

送楊大渭符之官離石

雨中柳鎖薊門煙相送河橋重黯然會見雄文召宣室未
妨才子令盈川秋風雁度明斜日汾水雲飛自漢年應憶
京華舊游侶酒徒還在酒鑪邊

徐州

彭城霸業已荒涼一塔凌空出女牆白草盡從霜後短青
山斜傍馬頭長東來雲氣歸芒碭南下河流接鳳陽回首
英雄幾邱隴大風還起戍樓旁

廣州

朝請通蕃國提封扼重關嵐迴庾嶺合水入虎門環虞苑
今何有仙人去不還獨餘羈客思長對白雲山
曩憶談南海今成滯粵鄉樓臺長作雨風月不知霜荷氣
生香浦苔衣上蠟牆雙鬟蕩舟女猶是喚珠娘

建陵

萬里開南徼風煙入百蠻日西聞杜宇天外見青山急浪
層陰裏韶音積翠間一丸封鳥道左顧有嚴關

雙江分別後一水尙名灘流向孤城曲聲含落葉悲采風
無故老剔蘚有殘碑簫鼓喧巫女時過銅柱祠

春日泛舟峭山湖遂登歷下亭

古亭展春目愜我褰裳期廢興亦已屢風流良在茲回回
一水抱宛宛諸洲披魚鳥識昏旦荇藻浮漣漪獨標海右
勝幾佇湖陰嬉地憶舊臺觀亭留北林詩修竹渺難問白
雲來何遲含情流易盈攬物境乍移微波搖西日緒風散
芳蕤奄忽人代易來者知爲誰

移居別池上桃花

幽栖聊復避羣塵池上孤吟過蚤春惆悵天斜臨水別不
須重憶倚闌人

蕭蕭竹樹繞亭斜鎮日關門但看花苦爲小紅添別思不

知身尙在天涯

金虞字長孺號小樹錢塘人康熙庚子舉人官孝感知縣乾隆丙辰舉博學鴻詞有小樹軒集

乘小舟渡江登黃鶴樓

漢上層陰初作雪目送寒空鳥飛絕扁舟一葉橫江來水
煙漠漠江天開玉遂仙人渺何處黃鵠磯頭仙棗樹棗花
吹落滿城香仙夢依稀武昌住武昌城下江水流武昌城
上三重樓游人到此不忍去芳草白雲生遠愁我今亦是
江湖客望遠登高頭欲白不須更訪白雲樓擊楫中流楚
山碧

羅池柳侯祠

李花十葉迎風僵碁師索飯中書堂八關十六子誰氏奔

日知錄言四卷之一
三
走朝士如驅羊河東才地本天賦銳意功名偶塗附醉客
未醒東方明獨惜清流非黨錮羅池跌宕從羸官蜚風瘴
雨天漫漫衡湘南畔解文學厥功不讓潮州韓生不逢辰
死威福驚山青青江水綠年年雞卜舞山岷聽徹迎神送
神曲

浯溪讀中興碑

文於天地不兩大我昔聞自浯溪歌浯溪深處漫郎宅後
有作者何其多中興一頌巋然在手剔蒼蘚三摩挲當時
翰墨鮮高手誰與八代迴狂波鸞臺鳳閣數燕許東封石
刻徒姸媿斯文獨任起衰責采薇六月相肩摩平原顏公
忠烈士肝膽契合心手和大書特書照巖戶如日始出星
交羅想當握筆幾透爪一一勁挺無纖頰因思往迹發長

喟亂由人召非由他妖妃孽臣早不斷迺出下策馳青驥
艱難百戰兩京復實賴靈武揮天戈儒官揚厲職應爾詎
忍腹誹含譙訶餘子紛紛若鐫鑿強作解事理則那三吾
亭子高嵯峨下有石鏡冷不磨飛泉灑灑生盤渦惜哉無
人洗山骨奈此玉佩瓊琚何

劉文炳字闇齋雲南太和人康熙庚子舉人官甯州學
正有藜照堂草

游紫溪山

冒雨探靈窟峯高末易躋人聲煙外接鳥道樹中迷鐘動
方知寺泉飛不見溪何當開霽景一覽萬山低
嶺峻林尤茂幽奇此獨鍾逃禪爲帝子聽法有神龍花散
千崖雨濤翻萬壑松曠懷追謝屐何處覓芳蹤

于始瞻字君惠號左村昌邑人康熙庚子舉人有螭螭吟

感懷

命儔烏啅林戲侶魚漾藻吾亦求吾儕研悅事幽討航川
有先正發難快朋好所得未分銖歲月已電掃峽東痛宰
木灘上悲宿草獨走燕薊塵壯懷驢背老回首孰問津四
顧少傾倒存者曙後星落落同枯槁山舟俄又逝老淚傷
懷抱填填肺病滋誰慰我心搆

朱續京字子析號夢霖聊城人康熙庚子舉人有六箴堂詩存

期友不至

夕陽在西山素月上東嶺叢篁凝露光澄波下天影清籟

時浙浙幽懷復耿耿無人話夜涼流螢度三徑

下第慰友

屢恨端明遺李廌不聞祠部識昌黎且從榮子歌三樂莫效伯鸞歎五噫

于東昶字湯谷號茲山平湖人康熙庚子副貢有錦璇

閣詩藁

詩話湯谷居恆好讀日手一編遇佳山水側帽微吟
流連忘返其兄東暹堯瞻博雅與相若而癖尤過之
夜讀恆達旦嘗語人曰百年如修蛇赴壑奈何擁黃
細作渴睡漢耶二于皆工詩湯谷尤雅飭沒後諸襄
七爲序而刻之

花除夕重舉洛如吟社

欣逢明日是花朝勝賞依然屬我曹檢點舊人成悼歎琢磨新句易蕭騷未妨橋畔時行藥何處山中好種桃邂逅

浮生憐此會莫辭堅坐醉金舳

初夏梅垞卽席

籍溪小築似花溪出郭移舟路不迷紅藥闌干雙蝶下綠
榆門巷一鳩嘯詩情忽向花間得物論眞於醉後齊邂逅
浮生憐此日莫教歸去不如泥

醉時歌

請君不用嗟身賤東市朝衣君不見請君不用悲家貧奴
輩利財殺季倫請君不用憂年老顏子賈生俱早天我生
兀傲天地間二豪侍側螺螟然清風入我室明月對我影
外此惟有酒徒詩客可與相周旋今夕何夕秋花鮮蟹胥
雞跖羅長筵上客季長及元歎賢主竹林籍與咸胡劉二
葉俱壯士鮑子沈生方少年諸君且勿喧聽我歌一言有

酒不醉非豪賢吁嗟乎男兒生世劇可憐生受五欲相熬
煎既不能揮魯陽之戈駐白日又不能跨王喬之鶴升青
天人生百年百無一身後之名縱輝赫何與冢中之枯骨
萬事不如杯在手急宜釀錢日沽酒此外區區復何有

雜感

世路羊腸九折盤可堪身復誤儒冠落花因果悲離濶凍
雀生涯怨紇干彭澤兒癡疏紙筆巨源妻老忍飢寒愁來
自擁牛衣卧滿眼鶯花不耐看

豈是人間行路難可憐天遣作儒酸蹉跎學士葫蘆樣潦
倒先生苜蓿盤檢厯乍驚佳節過披圖聊覓好山看漢陽
窮鳥吾真是何日翻飛縱羽翰

鄭相如字漢林號愿廷涇縣人康熙庚子副貢

詩話愿延輯涇川文載四十卷體用選樓舊例詩文
分類爲卷各體之末間附已作其子文熊呂仲年二
十舉於鄉早卒亦錄其所作入選

舟行

迢遞長河路解維日暮間雲橫城北樹花落水西山出浦
呼風疾停篙放溜閒星宵何處宿前去是江關

李國梁字鞏基號梅墅上虞人康熙庚子副貢

詩話梅墅富家子勤學如寒素困於場屋凡二
十餘年抑鬱而死死後其家遭火著述蕩然

華屋歎

卧龍山下誰家宅樓閣連雲高百尺陰陰喬木掩雙扉翠
竹斜敲粉牆白牆邊老人向我語此宅曾經三易主當年
結構費千金文杏爲櫟枏作柱其中池館最幽閒割取眞
山當假山風牽弱柳侵窗碧鳥蹴飛花綴砌斑朝朝暮暮

歡不已誰知衰盛旋相倚產籍家亡可奈何一朝更作尙
書里珠簾翠幕復輝煌慢舞凝歌樂未央玉簫吹徹層臺
月金鼎燒殘繡闥香據門豪僕猛於虎手把雕籠教鸚鵡
公子公孫盡慷慨黃金揮擲如泥土尙書死後二十年滄
海漸漸成桑田冠裳凋落繁華歇朱履賓朋散似煙從此
蕭條日復日子孫無力重修葺鴛瓦飄零畫棟頽鴝鵒夜
作人聲泣花落花開空好春苔痕滿壁總傷神參差亂石
堆荒沼十二闌干毀作薪不堪凍餓雙眉皺有人更把干
金購回首從前總惘然風光今日還依舊我聞此言長太
息世事紛紜安可測君不見蓬萊宮闕對南山數傳亦爲
他人得

山行

片雲如斷山半掩林下宅前路荷鋤歸時逢採芝客
踏葉鳴雙屐攀蘿仗一筇猿投霜後果鳥答午時鐘

晚晴移詩匯卷六十終

晚晴詩匯卷六十一目錄

錢陳羣 十一首

鄧鍾岳 三首

程元章 二首

留保 一首

王蘭生 一首

喬世臣 一首

勵宗萬 一首

謝道承 三首

沈起元 四首

黃之雋 六首

夏力恕 四首

陸奎勳 六首

儲大文 二首

黃秀 一首

何溥 四首

王恕 五首

晏斯盛 一首

楊宏緒 二首

盧見曾 五首

董思恭 一首

馬維翰 四首

宋華金 三首

梅枚

三首

姜任脩

三首

戴亨

十二首

彭仕商

二首

鄧牧

一首

梁機

四首

儲雄文

八首

鄧廷詰

七首

姜順龍

四首

晚晴簃詩匯卷六十一

徐世昌

錢陳羣字主敬一字集齋號香樹又號柘南居士嘉興人康熙辛丑進士官至刑部侍郎加刑部尙書銜太子太傅卒贈太傅諡文端有香樹齋集

詩評文端幼待南樓老人讀書至說命涕下不語母異焉則曰兒頗師之母曰汝立志堅定當遇恩主鑒汝其後遭際裕陵果以文學深被眷疎廣唱契合禮遇至隆嘗以祝嘏命自書詩冊得意手詔如魏晉間制赦爲世所誦晚歲命自書詩冊得意手詔如魏晉間制賜和獎許備至與沈文憲並稱江浙二老而恩禮始終爲文憲所不逮後昆繼起經術文學皆有專家科第仕宦至中晚不絕尤過文憲遠矣
抱疾出都潞河登舟用謝惠連秋懷韻

初覺煩慮清便忘疾疾患撫序秋正深驚時歲將晏俄看

雷霆過登舟後雷仰瞻雲霞爛無心警晨雞有意侶寒雁

涼颺輕襲裾新月忽窺幔啟塗信云首言旋直如半未問
季主卜豈邀隸首算平生感瞿瞿雖休毋敢慢恐辜眷舊
恩忍怠垂成宦觀往起遐思知來自深玩憂至時讀書興
發一遣翰近窗罨網施傍楫葭莢亂淒淒念未申耿耿坐
待旦抱跡義取韜執德理終煥誰無依戀情豈興遲暮歎
生還儻可期卮酒召親串

莊愈廬舍人齋中雙盆梅歌次陸根堂編修韻

尊前玉色東風面嫩晴天氣華堂晏主人愛梅有梅癖鄧
尉山塘踏來徧人間國色無雙姿無雙有雙得兩枝我生
不識邢與尹神光旖旎今見之須臾羈屐聯翩至對此那
能辭一醉當歌憶昔發餘思竹爐山館茶初試辛未仲春
鄧尉西溪梅事特盛上取竹爐烹年時扈從今退翁梅
泉賞之從臣皆有恭和元韻詩數種

花應笑同非同歸來忍負梅花約坐覺日月成虛空常怪
此花遺騷僅存雅離騷經以嘉卉喻君子獨逃名遂性全
遺梅花小雅則僅存其名山野縱令牙笙檀板爲君容終許破氈紙帳爲君寫

暮春訪汪玉山太守求是齋出歐陽圭齋送王都轉
長律橫卷適朱上舍攜春橋草堂圖冊索題卽用
圭齋韻應之

杖藜來試踏春泥夾岸垂楊壓帽低水曲便通朱邑里橋
平儼似白公隄疏籬鹿眼翠初潑細草裙腰綠已齊竹塢
漁莊最深處一層石路一層梯

舞蛟石

元趙孟頫所題今在徐太僕祠堂後

女媧鍊石補天缺巨靈五丁運悅歛雲根萬丈隨手捩指
畫變化自融結功成散材各飛去正如工師斫髡留賸枿

茲石不中選突兀躍拾逃洪爐側身一落三萬里乃在橋
李城內東南隅瘦如枯槁立曇瞿飄如瓔珞垂靜姝沐日
浴月幾千載亭館空聞閱興廢老藤蟠護如蔦蘿經春花
發珠百琲有時月下來美人拔劍縱擊沈將軍砮然聲裂
斷右臂血漬猶作紫繡紋有時化作扶筇叟霜眉雪鬢多
精神誰其賞之趙王孫手鐫三字斯籀文或云遺自花石
綱或云好事范長康千夫攜至清宛堂最後考古小邾子
強更其名非信史朱竹垞檢討集
中改名曰蛇蟠至今狂風驟雨夜空中
時見寒蛟起

秋夜步月至彌伽居士強恕齋話舊得十六韻限夜
字

不寢忽拋枕月色況投罇呼兒手筇枝召厮導鐙杷仰見

河鼓明雲光淨如研蟲語方欲稀市聲猶未罷踏月思訪
幽過橋仍命駕打門應蒼頭主人出相迂由來意外逢熟
識翻成乍婢醒點茶來婦起從樓下數錢問鄰酤陳果當
廚炙憶子未二十同業邏水舍往復討陳編無冬亦無夏
談諧每竟夕似兒噪不暇轉瞬五十年迅逝同一跨古人
云秉燭此義不予詐詩成且歸去病老正多暇儻許數過
從街靜何曾夜

集嘉樹軒分賦得花字

春波橋外碧流斜扶杖來尋道韞家石罅細通海眼水牆
陰初放米囊花解圍時聽屏間語題句留封壁上紗儻得
餘生成小隱太平風日約桑麻

餞秋

秋士翻嫌秋去遲感予白髮一題詩聲依孤雁斜陽外淚
灑哀蟬落葉時把酒放懷惟盡致登樓遠望復何疑尙留
難老秋容在獨向霜前吐異姿

峻菴大中丞以會讞來禾公餘過訪喜贈

東巡扈從憶當年馬上相逢揖大賢喜共談諧隨豹尾早
占位望識鳶肩論交鄭重金聲比載道勳名竹帛傳歲晏
公餘來話舊真如雪夜子猷船

江南開府髮如漆硯北尙書鬢似霜

川漁洋贈綿津山人詩意

昔贈雙

魚勞遠使今移專節近吾鄉與論治道扶根本更挹名言
見老蒼他日探梅乘興去好攜賜杖訪滄浪

南村

幾家茅屋曲通村卽事還同野老論風過林端喧鳥雀日

高原上散雞豚波光潏灩初平岸黛色參差卻對門最是
閭閻瀟灑處義皇景物自常存

渡江次昌黎山石詩韻

寒江潏灩波紋微檣烏瑟縮凍不飛舟中小奚見未見以
手笑指江豚肥行年十八初渡此欲紀往躅皆依稀南人
北去走燕市大抵多坐寒與飢我今已耄復問渡焦裴揖
我開丹扉漁舟競挽自高下導我出入浮晴霏須臾親知
下瓜步歡然款洽譚成圍殷勤相視各一笑笑我白髮猶
行衣隄防津吏有慧眼要識紫氣來相讎家兒攜孫昨送
我期我十日行東歸予挈幼子汝器至維揚就婚於故大
汝恭攜孫輩來送期予長至中丞義村唐公第宅大兒汝誠次兒
左右當遲我於落帆亭畔也

鄧鍾岳字東長號悔廬聊城人康熙辛丑一甲一名進

士授修撰官至禮部侍郎有寒香閣集

諸話悔廬勤學博聞而恂恂謙退友于諸弟入詞館督學典試四至江南以老病乞歸尋卒於里第

南軒卽事

松陰庭院午風涼
壓架青蘿繞畫廊
敲枕不知清夢破
一簾微雨棗花香

東園柳枝詞

林影參差遠障空
雲廊畫閣有無中
清明十日春光好
綠染垂楊第幾重

樹頭新月細如鉤
樹底新煙翠欲流
堪笑踏青人草草
和煙和月上漁舟

程元章字冠文上蔡人康熙辛丑一甲三名進士授編修官至刑部侍郎有師洛堂詩集

榕城晚霽

海日朝逢霽江雲遠度城垂藤含雨重斜燕逐風輕飛閣
凌雲影清泉落沼聲客懷隨地好把酒聽嘯鶯

游韜光寺

層巒煙火外別自有乾坤山靜鳥迎客雲深僧閉門登峯
低碧落開眼見中原待月添幽興題詩記爪痕

留保字松喬滿洲旗人康熙辛丑進士改庶吉士授編
修官至吏部侍郎

閩中道上

無諸故國越疆分罨畫圖中作使君野竹夾成山澗路芒
鞋踏破嶺頭雲爽來空谷連朝雨香起幽蘭盡日熏遐想
歐陽詹去後祇今南土有人文

王蘭生字振聲一字信芳號垣齋交河人由諸生召直南書房康熙癸巳賜舉人辛丑賜進士官至刑部侍郎有交河集

諱話信芳爲李文貞所賞拔文貞巡撫直隸選士之秀者入書院親課之信芳與焉文貞自冢宰入內閣無日不從自經書性理外旁及音律靡不講貫討論及開書局修律歷諸書文貞舉以應詔保直內廷屢承顧問律呂正義韻學

闡微諸書皆所參訂
送安溪先生給假歸里

夫子命世儒千載明良遇德位兩相符君臣一心固自昔履諸艱屯亭望彌著婉轉達恪誠精明行平恕衆美萃厥躬欲言難指數余生十室邑幼乏師友助應試始童子握衣謁公署拔之儒州中詔以賢關處手授揅著法口傳太極註及擢鎮封疆九郡才英聚得厠精舍旁與聞名理趣

如寶盈市塵取攜恣所慕願奢力不充駑馬蹟長路佳藥
贈獲苓名醫尋扁跗成我同再生奚止陶冶鑄竭來游帝
都校讐得參與朱子八十篇從頭味章句遴才廣闢門匪
俊亦獲顙頑璞綴琮璜短翮隨鴛鷺理數聆精微大樂聞
韶濩分薄榮寵多夙夜抱憂懼孚愧未盈缶并起徒射鮒
凜凜師傳言昭昭聖哲諭事上在立身曰惟尊矩度重任
不易勝至道難遽悟所期一藝明敢辭千辛赴有階始可
升迷津焉得渡轉盼兩春秋再啟余心鋤

喬世臣字丹葵滋陽人康熙辛丑進士改庶吉士授檢討
官至工部侍郎

月夜步魯王宮遺址

荒城一片月何處漢與秦珠璣餘瓦石臺榭留荆榛魯宮

今不見況乃宮中人阿房三月火姑蘇千載塵徘徊意無限聞鐘警迷津

勵宗萬字衣園靜海人康熙辛丑進士改庶吉士授編修官至刑部侍郎

詩話勵氏三世長秋曹衣園承祖父遺緒入侍講
擬出典文衡極敷歷之盛工書法詩藁散佚不傳

秋日屯留道中

迤邐平沙一徑通驅將溽暑仗金風人行翠陌青疇裏秋
在縣雲絮雨中礎杵隔村時送響旌旗臨水偶搖紅兩年
三過銅鞮路吟到丹楓興不窮

謝道承字又紹號古梅閩縣人康熙辛丑進士改庶吉士授編修歷官內閣學士

詩話古梅爲林來齋鹿原之甥又嘗從黃莘田游所
著硯史一書搜輯極富在詞垣與同里吳劍虹侍御

文煥以詩文相切劑和劍虹冬至感懷詩有令節異鄉愁裏過微名他日史中求之句與釋褐謁文廟詩皆可想見其襟抱

釋褐謁文廟

六經原不爲科名爵判天人在此行今日辦香分獻後驅車歸去自分明

秋宵不寐重讀莘田題硯諸製愴然有懷

徧踏蠻溪琬琰空詩人筆墨尙熊熊文昌樂府三千首誰爲修書李浙東

牂牁一葉下閩江十硯蕭然鎖夜窗起剔秋釭拜東野寒風襲襲影幢幢

沈起元字子大太倉人康熙辛丑進士改庶吉士授吏部主事歷官直隸布政使內擢光祿寺卿有敬亭詩

文集

詩話子大自爲諸生時卽敦厲廉恥嚴義利之辨居官勤於民事不畏強禦尤精易學有周易孔義集說其詩踔厲沈雄於國初諸大家外能獨樹一幟與許子遜廷鏐齊名時有許沈之目沈歸愚序其集謂格高者規撫少陵長篇百韻以下俱近白傅卽小小詠吟亦不入宋元纖佻之習今集中傑作多在中年未達前晚歲專心政事篇帙寥寥蓋未極其才力所致也

丹陽道中

傑閣臨城迴斜陽挂塔曛清波寒鷺影白草亂羊羣市火酒帘動鄰船醉語聞此生初作客天末認吳雲

寄酬顧大嗣宗見懷之作兼簡陶柱中繆昭曦

青禽下罌風籠致湘江濱豈不慕儔侶空望湘山雲湘雲若情人可望不可親孤懷憑弔影含意誰爲申炎方苦毒熱深甑坐蒸熱清風忽然至乃得故人札緘封一斛珠客

子淚所結迴環萬古心惆悵經年別離別庸何傷嗟爲餬
口忙風塵與霜露盛年鬢已蒼飢鷹傍人飛有翅詎得翔
君母八十餘我父七十強有子各賤貧長倚門間望此恨
不可道又見秋風早團團白露零幽蘭冷衰草朝接孤飛
鴻暮偶獨語蛩飛鴻將我心縹緲凌長空亂蛩織我愁煙
月俱朦朧牢落天地間何由託微躬屈指故友朋十人九
浮萍稍喜癡虎頭共此瀟湘清我爲磐石止君作車輪行
握手良不遠一水徒盈盈羨君知己多一室聚蘭臭陶子
何嶽嶽青虹落眼後繆子復耿耿詩與骨俱瘦異鄉得同
心新交每逾舊未知文酒伴時說狂生不待報一函書難
憑雙鯉魚夫容空采采江水正愁予

平山堂雅集用昌黎會合聯句韻

成都費滋衡景陵唐赤子山陰徐竺

山維陽程午橋郭秋浦謝鳳崗黃伊人程
君奏淮南周白民邊頤公程風衣同賦

朋交邂逅新敦槃風雅重秉燭興騰騫訪舊情賈勇溝荒
樵月乾樓圯岡雲聳城蕪今古春江遞歌哭湧獨有平山
孤危厰豁滯壅廬陵樹文幟戔媚接芳踵詞苑得江山隋
宮失邱壘沈吟不朽蹟倍切同腐恐堂勢盡千里氣象收
萬種烏馭閃陰晴魚龍混雜穴孤撐夏修竿綿延疊疑塚
鸞音半嶺嘯傲屣南面寵大游鵬負息齊物菌蒸拱矚遐
胷爲寬坐曠神絕恂芒忽受虛來沆漑飽清奉巒光滌肺
腑翰墨振痺腫昔賢吐高燄茲境實厚擁吾儕及嬉娛清
尊徒迭捧微爭戰蝸蠻細響弔榛菰窺穴張籍盲跂前支
離燿景迅過蜚飛名形固匪闕輦甲三立鮮崢嶸七尺亦
劣燁瞻禮俎豆肅俯仰神骨悚端賴干莫利心蓬薙蒙茸

敢託砭砥質言玷確珪珙吟思捲綺霞夕姿曳繡隴棹舩
香荷蒲襟袖鑑清溶塵韁乍脫羈天械亦解萃情比叶塤
簾盟長宗介冢談味快沃焦離緒旋抽蛹竹林幾閑逸雲
達或踔踊孤懷駐景方早計禦寒氄神龜甯曳塗蒲牢詎
栖甬崦嵫薄日外驚濤正呼洶

效白體寄兒子大抱一百韻代家信

四民有恆業士子恆爲士我世詩禮家不士卽不子汝生
母腹中母夢指出雉雉飛指卽枯汝生母遽死苦孝恭順
姿遺體獨有爾大父名汝抱珍愛同卧起憐汝失乳孩望
汝續祖妣而翁苦饑驅奔走動千里繼乃通仕版內外厯
轉徙趨過跡亦疎言立罕提耳常懼宦游早聽汝廢書史
又懼紉綉習誤汝於侈靡我乃失教愆長貽九臬恥往往

縉紳後非愚卽癡駭往往寒素家子孫踵前趾故我罷官
歸無愠實有喜且得課而曹冀免豚犬訾羸金旣無累一
經聊可理歸來汝已長衣裳與我比叩汝腹中書荒蕪雜
荆杞試汝手中筆艱澁叢穠穠長歎幼學年蹉跎象勺齒
俄然成弱冠努力尙及此聖賢與豪傑皆從立志始能具
什伯功愚柔豈終止苟能惜寸陰不爭鈍與駛五經四子
書人生命之柢昔聖垂此書一一教踐履一言得終身卽
分聖一體一語苟違背撫躬面爲泚儻胥蔑棄之貌人而
心豈須念制科義豈僅命題紙汝讀當熟讀咀嚙味乃旨
汝讀當精思貫穿到神髓以之治汝心如鏡刮塵滓以之
治汝身如杖得仗倚一讀一返念應自得臧否汝今爲弟
子孝弟乃切已後母非曾母均愛無二視家貧復善病定

省繁爾恃自古稱長督督義良有以汝有兩幼弟童牛繫
金柅須勤課記誦勿任覓栗李敬事諸父行愆莫乾餽啟
善擇朋友交親仁戒比匪威儀愼爾容虔肅將祭祀况汝
既娶婦便作成人儼百行將汝責有敗不及悔苟能學爲
人爲文道卽是天地間至文只在性情裏氣機妙闔闢脈
絡邇原委結構師工匠運思欲奇詭上資左國華俯取秦
漢綺佐以韓蘇筆力勁如弩矢擴充到蒙莊變化掉龍尾
讀史先看鑑今古如列軌且放眼孔寬庶拓識力偉制藝
法慶厯步武森律紀務絕陳俗語勦襲尤足鄙古來君子
人文章五嶽峙我茲諄復誨豈必貴朱紫不見螺贏負頻
呼式穀似而父不足學祖德可無跂大父純孝資白首孺
慕在撫字諸弟妹存沒罔不逮內行重鄉邦文名動四海

汝今若不學如橘化爲枳昔年愛汝心何以對筵几汝母
夢亦虛汝母竟已矣念此應慟哭忍不加礪砥去年攜汝
出高館鍾山趾青鐙理舊業勤苦窮膏晷復恤汝羸瘠未
免老牛舐駑駘兼病驥懼不任鞭箠我出今汝留又恐或
廢弛洗桐乃名師居宇况密邇朝夕就請業進學貴憤悱
善疑復善問辨難當徹底領悟及談諧效法到步履庶漸
去其疾冀以臻厥美保身如執玉毋令或損毀力學如力
田及時務耘耔未知出門後所業復有幾未知眠食間精
力尙亶亶我行及淮壖腸輪差足擬詎願捨子出傭書豈
得已是時三月暮翦燭醉春蟻醉餘時夢歸委巷城南背
舊林筍如簪新梧葉如洗畦菜正吐花薔薇亦放蕊彷彿
讀書聲明明爾兄弟醒來日高春乾鵲噪桐梓披衣覽明

鏡鬚髮日夕改回首功業虛萬事赴流水惟餘念子心鬱
結未能擺書此遠寄汝汝宜朝夕視宜書數十篇闔闔門
庭阨處處拈一幅在在得顧諟如在我膝前如聞我斥指
汝有不解處可問顧夫子

黃之雋初名兆森字若木一字石牧號唐堂休甯籍江
南華亭人康熙辛丑進士改庶吉士授編修遷中允
乾隆丙辰舉博學鴻詞有唐堂集

沈歸愚曰雲間詩自陳黃門振興後俱能不入歧途
累累繩貫至盧文子後又日就衰隤題所宗法矣唐
堂學殖富而有而心思才力又足以驅策之故能
自開生面仍復不失正軌謂之詩學中興可也
詩話唐堂幼解四聲有舉古語天子聖哲者因歷指
經書中康子饋藥何以報德妻子好合於女信宿鐘
鼓既設充耳琇實等句釋珂月稱為神童少壯屢困
場屋戲集唐句為香奩體千首日香屑集聖祖南
巡又集唐七律九十首欲獻未果詩為海甯陳文簡
靜海屬文恭所賞嘗著冬錄自述生平謂少時蓄四

願結友四五人以講學仕七八品以從政齒六七十
歲以閱世著書數卷以傳世既而益友不乏官曾六
品壽已八十集且六十卷皆溢始願云

種王瓜籬豆諸蔬

昔逮親養日灌園佐擊鮮親亡事奔走忽忽二十年倦游
返衡門老圃聊息肩修我灌園業情事恍如前汲水諒非
水清淚同涓涓此蔬親不逮此圃親所傳終作抱甕身五
鼎未列筵瓜瓠如有知爲我根蔓牽蔓則蔽蒼野根則入
黃泉以告我父母貧賤子可憐瓜瓠莫結子有子亦徒然

水碓

轉輪在水稻在屋糠粃如塵米如玉誰其爲之機與軸坎
臼在地杵在水橫貫輪心輪運瀑以溪之水代人足列杵
五六杵齒齒一杵入臼一杵起圓輪迫杵水迫輪急急晨

昏春不止溪女鬢插山花紅列坐日旁如課功從容揜袖
簸揚畢勞逸不與吾鄉同我來如聽一部之水樂輪音爲
商杵音角

登報恩寺塔絕頂

到眼無埃壒蒼茫入素秋萬家斜照外千古大江流金碧
翔霄表蚪龍壓石頭長安稱雁塔此亦舊皇州

漂母祠

少年欺帶劍老母念垂竿恩怨一時有波濤千古寒封侯
金自易乞食飯應難最是窮途感英雄淚不乾

武昌懷古

碧眼孫郎此建都憑陵中國控全吳危磯冒堞猶黃鵠長
鎖連江豈赤烏霸業久隨流水去客愁惟對楚山孤太平

城郭周遭在戰壘荒荒隱綠蕪

鄂渚樊山幾度秋大江日夜向東流戰船浪捲陶公廟賓
幕風迴庾亮樓煙雨六朝迷夏口帆檣千里接荊州英雄
名士俱陳迹輸與沙汀數片鷗

夏力恕字觀川晚號環農孝感人康熙辛丑進士改庶

吉士授編修有菜根精舍詩集

詩話觀川謂詩以道性情性情之正所謂喜怒哀樂
發而皆中節非窮理知言盡心養氣無以與於此其
詩雖未能盡副其言而不事雕鏤自具天機是能以質樸勝者

出廬山作用十二兒韻

舊游廬山南今過廬山北山光兩腋間忽忽生羽翼初行
尚晴明青蒼無氣力雲重倏黯然遙天捲虛白雨腳穿雲
根四圍不可割石級水生波溟濛入憚國燎衣茅店中粗

糲供晚食黃昏到古寺寂寂簾影黑佛火猶未然碑碣杳
難識踏石尋歸路張鐙望素壁中有絕妙辭粉落字半蝕
酬唱坐欷歔一例天涯客拳手暫支頭萬竅號枕側窗外
有星芒起行望山色山盡雨亦休回首浩無極

王荊公故址

巍巍公輔地乃在城東隅春風爲慘淡野鳥相招呼宋朝
享祀配尼父數百年來委殘土此心致主豈有他學古無
權空滅古遺藁重生歎末流黨人名姓石工羞皋夔稷契
亦已矣讀書執拗乃如此

讀昌黎詩

韓子戛戛去陳言文章旣得萬口喧我愛韓子好詩句戛
戛更覺陳言去金鐘大鏞聲九天罷考弛擊仍鏘然赤手

捉蛇足履虎緩帶輕裘文不武才大踏翻騷客壇躡空走
漠相盤桓李唐一代詩如蛸機同錦繡鼎同味其先厥有
陳子昂後來韋柳繼孟王仙風太白絕塵表少陵之詩詩
獨老自餘支派非不多衆流焉許肩江河下視元白豔且
悞驅馳籍湜驂郊賀公不步人人步公縱肖其形神弗充
學者莫作雕鏤想言以氣浮須善養

程季靜齋中同諸子卽事

屐齒纍纍索酒杯君家兄弟疊相陪一株花底殘更坐百
舌聲中曉夢來老眼湖山歸澹泊舊牆風雨上莓苔瀾翻
那記通宵語正欲題詩墨瀟催

陸奎勳字聚綏號坡星又號陸堂平湖人康熙辛丑進
士改庶吉士授檢討有陸堂集

詩話坡星年十二賦中秋月夜述懷云碧天如練夜
初涼金鴨閒薰一炷香翫月忽驚鴻影度學詩偏愛
鯉庭長陰晴自昔同千里兵燹何時靖八荒祗恐雙
親添白髮宵分重進桂花觴詞賦屬雕龍早年卽有文
譽游京師與楊次也沈厚餘柯南陔唱和有折西四
子之目年垂六十始成進士入詞館修明史分纂萬
厯以後四朝列傳一校禮闈卽引年乞歸家故貧晚
復游桂林主書院以自給穿穴五經皆有述作詩工
贈明麗蓋自西崑出而益之以疏岩視
歸愚子才行輩較前故不受其範圍也

寄鴻軒諸子

酒旗歌板憶同羣臂纓春來月減分弟子心疑進學解先
生腹草送窮文短檠多淚何堪翦小硯無年卻要耘果有
洛陽田二頃不勞封作武安君

輓沈南疑

曼卿不樂主芙蓉少霞不解銘新宮玉書下徵蓮斗子雲
旗雙護白耳龍我儕與天爭不得燭花迸落情淚紅思君

復讀茜村詩夷光鄭旦無怡容集裘照眼萬翠鳥釀花可
口千壺蜂人妒此才天不妒前身果否白鶴董天姥峯尖
續殘夢綠鸚一笑煙濛濛蛾眉未信能伐性風騷何必例
坐窮單豹養內虎食外張毅養外病攻中男兒墮地命在
天生死貴賤貧富同死者自甯生者哭半杯松葉飲不空
有文有子堪送老淺語抹殺歐陽翁悲哉文冢化朽壤悲
哉驥子號酸風

答艾廬弟

落筆如彎射兕弓抹他坡老與涪翁貧家幾處添詩料紅
雨吹殘一桁風
北樓雖冷勝堪容種柳無心且種松王氏古歡甄一片蘇
家清玩木三峯

萬壽寺銅鐘歌

廣源開西水竹叢梵刹金碧摩蒼穹就中一殿製宏敞梁
施鐵綆懸華鐘厥重萬鈞徑丈二何年治盡耶溪銅前代
長陵始建國兵戈甯謐財力豐方袍少師特監造小心學
士書法工華嚴全卷八十一自表及裏填虛空金剛般若
貫兩銑首楞嚴咒環旋蟲蠹時留鎮漢經廠長鳴侯爵蒙
褒封後來移置萬壽寺土木窮極貂璫馮樓頭日俾六僧
擊由旬以外聞春容咄哉烹廟聽不聰委鬼竊柄茄花紅
訛言白虎聲宜啞卧之朽壤榛菅中銷磨點點滴滴雨剝
落調調刁刁風聖朝百度悉興舉神物久淹還遭逢觀者
合十相贊歎遠勝鼉鼓音逢逢我生好古漸成癖周遭細
視指雙瞳牆東高槐冒斜照柴車欲返愁恩恩願以寸莛

發鯨吼人天震動開羣孽

嘗陳豆

海昌相國攜蠶豆種栽於桂林今呼陳豆

蠶眠非我土豆莢忽嘗新實少腹猶果沙遲醉幾巡名齊

金氏薯

外會祖金省吾先生巡撫福建有金薯亭

味敵陸家蓴植物留遺愛農

歌久未湮

儲大文字六雅號畫山宜興人康熙辛丑進士改庶吉

士有存研樓集

詩誦宜興儲氏世以古文制義名家六雅同產五人先後同榜登甲乙科世稱五鳳齊飛惟六雅及弟龍雲兼工詩而龍雲子石亭詩尤清逸推爲後勁其

他羣從子姓有傳集者不下十餘人可謂盛矣

秋江詞

瑤草湄瓊樹杪海客居何縹緲泛長江楚天曉木蘭舟外
煙波繞江上山嵯峨仙人樓迴輕雲過美人簾卷秋色多

鴛鴦隊隊忽驚散西風遙送采蓮歌采蓮歌怨遲暮芙蓉
花墜江露

夕望貽萬鶴樓

黯黯浮雲夕照開開身縱目上高臺自南鴻雁隨春去直
北星辰入望來京邸可容方朔誕臨邛誰愛馬卿才相期
共采名山藥雲卧銅官慢遣回

黃秀字君實巴陵人康熙辛丑進士改庶吉士歷官山
東道監察御史

詩話君實成進士年已六十
官待御乞歸年至九十乃卒

九日登呂仙臺

洞庭秋正滿乘興一登臺萬頃浮天出孤峯擁日來湖山
誰作主憂樂世需才且縱登高目臨風共舉杯

何溥字淵若號謙齋滿州旗人康熙辛丑進士官刑部

主事殉難贈雲騎尉有愼餘堂詩集

詩話謙齋與兄廣菴舉士同榜成進士時稱二何謙齋以傳溫懋薦授官從征噶爾丹失道行山谷間困於敵拔刀陷陳馬蹶遂戰沒爲詩古文辭才氣洋溢集未刻行大半散佚深可惜也

夏曰雜詩

車馬曾無到薜蘿論交能得幾人過月臨曲徑花陰轉簾捲薰風午夢多買駿但思郭氏語吟詩空憶杜陵歌蹉跎深惜光陰去近水樓臺老芟荷

石崇

一敗淮南死季倫石家金谷不成春墮樓人有英雄骨不似檀郎也拜塵

虞美人

遺恨江東應未消芳魂零落任風飄
八千子弟同歸漢不負君恩是楚腰

伏劍當年事幾更春風吹草得芳名
時人莫羨朱顏好箇是千秋碧血成

王恕字中安又字瑟齋銅梁人康熙辛丑進士改庶吉士官至福建巡撫降浙江布政使有樓山詩集

詩話瑟齋由庶常改吏部五年擢至福建巡撫以廉勤受主知詩平澹清夷不事藻繪可以想見其爲人
雜體次韋蘇州韻

蠹魚恣貪饞編簡偷齧蝕妄想神仙傳
不復分黑白典謨何煒煌縹緗爲裝飾
微蟲偶傷殘明者生疑惑河洛出圖書
天地留聲色龍龜欲呈祥蠹魚何時息

步出城南門道逢採桑女衣沾草頭露
心在機上緒陰陰

助聖集言四卷之一
葉正肥戢戢蠶可數游絲千尺強空來天際舞文繡被人閒誰知寒女苦

登太白樓

翠螺山前江水清采石磯上山煙橫王孫一去無消息萬古江山空復情憶昔星精初破夢天上神官親抱送暫令金宿歇光芒要使人間識麟鳳一朝名字聞金闕狂歌痛飲君王側題詩不識高將軍一曲清平留不得潯陽白日風翻波夜郎宵雨瘴煙過到處天涯感流落逢場嘯傲從譏訶歸來偶過青山趾牛渚茫茫月如水兩槩船頭著錦袍醉吟百尺滄波裏船在江心月在天江如月姊鬬嬋娟翻身一躍騎鯨去長庚炯炯光依然至今明月清風夜疑有笙鶴來山巔

己未七夕用王溪韻

烏鵲年年管別離
涉秋髡首助佳期
試看清漢橫分處
又是浮槎欲渡時
天上白榆長厯厯
西來青鳥故遲遲
寸心此夜千迴結
不斷蟲聲惱鬢絲

灩澦石

高峯縹緲白雲屯
雲氣冥濛晝欲昏
江帶蜀山奔楚峽
天留巨石捍夔門
蛟龍窟穴根無極
象馬分明水有痕
劫火幾回然又熄
瞿塘依舊一卷尊

晏斯盛字一齋新喻人康熙辛丑進士改庶吉士授編修官至湖北巡撫有楚蒙山房集

冬至和同年馮桐村

三載薊門逢小至
冬深歲事又催人
火燒榾柮消寒序
酒

滿壺觴勸老親北陸星辰迴左輔南郊扈從肅中宸儒生
幸際昇平日淡味希聲共討論

楊宏緒字丹山新繁人康熙辛丑進士歷官浙江按察
使有直養齋集

別姪婿王子端

不欲與君別天涯親故稀吾行正無定爾去欲何依家信
煩重寄鄉心欲並歸相看共惆悵日暮海雲飛

建州道中

幾年不見浣花溪回首蒼茫海日低笑我當官無雁處程
程都聽鷓鴣嘯

盧見曾字抱孫號雅雨德州人康熙辛丑進士歷官兩
淮鹽運使有雅雨堂詩集出塞集

詩話雅雨筦淮隄前後數年延致名流惟恐不及如
金壽門陳王几厲樊榭惠定宇等數十人皆爲上客
愛古好事世所豔稱詩筆健拔而詞
旨深厚窮居塞外有惓惓望闕之忱

承恩出塞留別揚州諸故人

解網深仁且莫論孤臣猶在識天恩三年便許朝金闕萬
里何辭出玉門沙暗陰山秋獵壯雪明瀚海夏裘溫多情
應信揚州月直送征輪到塞垣

過瀚海

龍沙迴望更霑衣樹別兼旬鳥見稀惟有頑山時外向曾
無活水不東歸氈屯犬靜笳飛怨草鋪鐙昏雪打圍宵寐
難成成莫醒夢行定不背朝暉

送司空還山

賀公矍鑠據歸鞍不死龍沙風雪寒到此纔知臣罪重餘

年敢忘主恩寬已無綠水疑巢父容有蒼生望謝安帷幄
邊機重召對漢家振旅不爲難

豈應聞喜轉生悲無奈恩深重別離億萬人中曾識我五
千里外更依誰荒煙爨冷分甘地胡拍聲殘祖道時此去
桑榆但尋樂不須悵觸寄相思

謝劉百朋臺長送鎮江醋

穹廬兩事眠與餐黃梁一飽游邯鄲出入九重要十艾麾
斥八極驂三鸞誰歟抱瓮輕剝啄偃僂而進容肅端猶疑
人在華胥界麻姑送酒來仙壇開札纔知君意厚爲柔葱
薤平病肝我昔擁旄貢形虎頗與醯人同職官醯人長賤
鹽人貴推尋此故時嗟難雖然富國無近效和羹大用誰
能刊雅愛京口傳祕製風味不減桃花酸舊游悵觸一回

首關山萬里江漫漫問君非乞非自造何以得此於呼韓
名流耽癖空好事報書一笑君須看既無美膳實金鼎又
無生菜調春盤縱云鼻吸三斗爲宰相但覺吾輩骨格殊
清寒

董思恭字桂川號雨亭壽光人康熙辛丑進士改庶吉
士歷官湖南糧儲道有悔菴偶吟

放舟

向夕荆門道輕帆掛好風雲低千艦黑岸闊一燈紅晝夜
隨流水東西笑轉蓬嘯歌翻自樂無事到胸中

馬維翰字默臨號墨麟又號侶仙海鹽人康熙辛丑進
士歷官江南常鎮道有墨麟詩集

詩話墨麟詩宗杜韓王景略墓云遭際卧龍同出處
才情捫蝨擅風流朝元閣云樓上夜涼閒大被水邊

印明集言四卷之二
春盡散諸姨議論澤以
詞藻無復馳騁之迹

晚秋張比部舅招飲涉園

木葉秋深烏夜村城南風景愛張園捲簾雲氣收秦駐抱
閣潮聲落海門魚躍鏡中欣出網鶴飛天外薄乘軒退思
前席持螯處真比泉明松菊存

雞頭關

雄關昂然來下插谿谷黑肖形呼雞頭離立矯鳳翼是日
山出雲蒸雨灑未息碎石踏更危古棧漚逾仄一綫蟻負
緣七盤磨匍匐草樹童不毛人畜戰無力焉計千丈強但
覺四山直懸厓愧老僧置屋自胸臆

蠻莊用少陵白沙渡韻

蟻緣轉山腰千尺聳碕岸板屋數十家衣裝雜蕃漢問之

曰蠻莊郵程未及半木杪出旌竿前驅隔林喚水深泥滑
滑日澹風漫漫修樾蔭垂藤點點牛羊散星火迫輓輪魚
貫人影亂儻非倖有秋箸畫徒永歎

古隘口

茲行春未半桃李旋成蹊番夷亦耕作兩牛扶一犁漸入
古隘口微雪風淒淒窄磴上不已似欲窮天倪深厓壁如
削直下流青溪唐人設關處湮沒無由躋纍纍碎石明隱
隱哀猿嘯勉旃率先路夕日方平西

宋華金字西邗商邱人康熙辛丑進士授吏部主事歷

官襄陽知府有青立軒詩集

詩話西邗爲西陵孫山言子少承家學以詩名王謝烏衣風流未遠

登妙光閣

爲厭市城喧來訪化人境振衣登高閣秋空挂嵐影古松
臨危欄俯身摩其頂正始諸先民於此曾煮茗老僧話疇
昔故物存石鼎彈指三生間悠然發深省

東平古墓行

月黑山頭零夜雨石馬嘶風石人語墓前春草吹又生墓
後松柏摧爲土古碑深鏹大元年肩屬僵卧雙螭纏荒村
誰爲作寒食舍人小冢伴荒煙不須過此重歎息世間萬
事有終極南山欲錮竟何如漢寢唐陵人莫識

主敬以西青題予齋爲賦長歌

太行之山出關東蜿蜒千里翔飛鴻高拱神霄衛瓊宮羅
列萬朵青芙蓉下臨九陌佳氣通雲蒸霞變煙巒叢開軒
西望見一峯螺黛窈窕當晴空營邱摩詰狀難工錢郎暇

正眼遙從拄杖掛翠辭心胸醉呼一斗松液濃西青二字
顏齋中寒蛟秋蚓迴筆鋒山靈起笑撥雲封更催雨師洗
山容落日晻映含夕春仰睇遠色無終窮碧漢又見摩青
銅

梅枚字功升號慕堂南城人康熙辛丑進士官禹州知
州乾隆丙辰舉博學鴻詞歷官泰安知府

早春秋水園看梅花

尺五城南韋杜莊紫薇紅藥碧簫笛就中別有蕭疎意一
院梅花間白楊

幾度春愁幾寂寥今年花事絕嬌嬈吟腸賸欲相料理風
雪騎驢憶灞橋

沙鳥寒禽對水涯茅亭古屋共橫斜他年買宅成高隱只

傍孤山處士家

姜任修原名耕字自芸號退耕如皋人康熙辛丑進士
官清苑知縣有白蒲書屋詩

二十四橋望月歌

廿四橋下秋水清廿四橋上秋月明水清月明兩相向登
橋一望知秋情秋入江南早凋動江南草可惜杜司勳不
耐秋風老風颯颯露泥泥砧杵急鴻雁飛青樓十二今何
在夢繞揚州歸未歸橋下水流流不止繁華流入西江裏
二分明月誰爲繩尙在人間照空水

與華豫原言懷

不顧人岑寂風檐作雨聲一鐙搖兩影百盞到三更生死
容身許乾坤有骨撐醉言如可信終古見交情

寄焦山諸舊游

江上青峯在相望十七年幾時閒話舊昨日醉逃禪我已如僧老山猶憶客顛憑流將夢去先到海雲邊

戴亨字通乾號遂堂漢軍旗人康熙辛丑進士官齊河

知縣有慶芝堂詩集

詩話遂堂爲文開侍講子少從父徙遼左遂占籍成進士作宰誠慤有惠政罷官後嘗依盧雅雨都轉客邢上詩森秀堅蒼與李薦青陳石閭齊名雅雨爲合刻遼東三老詩侍講能製火器中譏謫廢遂堂集中有詩哭其弟高注謂高獨得侍講武備之傳又有詩送其姪秉瑜從軍大金川序謂前廣督鄂公彌達曾令造九節火砲進呈命解軍前効用是待講子孫猶能以製火器世續其業

聽門人沈周頌彈琴

朝雨生微涼塵客絕來徑枝上鳥聲清階下苔痕淨獨坐小窗前名花素磁瑩邱壑結遙想清吟寄孤興爲我張鳴

琴燈心發眞聽泠泠太古音天宇夜深靜

乙丑秋孟穎仙告予貧甚質衣助之偶檢文篋見其舊字感而賦此不必寄孟也

南海有奇香置諸崔嵬博山之金鑪朱火揚其芳光彩氤氲凌上都豫章梗枿在空谷雨露之所濡造物之所育堅理直幹經千春梁棟不爲用樵夫收豎摧爲薪君不見歐冶子能因國君銅鐵利鑄作金鐘大鏞器而令爲身謀不能自作一鼎解園女拾寶戟但用刈秋葵盲者得寶鏡不堪蓋陋卮干將莫邪補破履不如市頭三錢雖君不見百里奚鬻身僅直五羊皮陳平宰割天下奇奉身安能烹隻雞古來賢豪遇合有遲早其中不遇亦豈少遇則堪爲帝者師不遇但爲蓬蒿老君不見唐時宰相張公鎬

黃葉歌

嚴霜凜冽天沈寥調調刁刁風怒號感茲黃葉歌且謠黃
葉未黃重陰交脫離根株隨所遭黃葉欲下風欲高旋看
墜地旋青霄風葉相激聲蕭騷此時孤客正寂寥四海無
著東西飄懷鄉倍覺關山遙

送艾明德入都

曾說君西去初聞不作眞徵車明在眼別酒暗傷神愁極
今誰侶貧同獨爾親臨歧重把袂瑣屑問回輪

雨後山行

宿霧收林薄探幽興不違過橋通蟬舍卓杖立漁磯疏雨
灑山麓野風吹葛衣看雲閒出岫踽踽欲忘歸

山雨

遠峯深翠裏隱隱起輕雷石氣蒸雲上山風挾雨來亂流
爭礧落棲鳥破煙迴明月東岡出披襟坐釣臺

孤雁

雲路誰相導先羣衆所推將飛行忽斷欲落意還疑影隻
驚弦及霜寒奮翼遲陽回神自旺高舉迴難追

懷李廌青山居

邂逅盤陰叟旋生棲隱情爰居驚海祀黃鶴恥軒榮已沐
煙霞久懸知身骨輕高踪慙沮溺結耦事躬耕

秋蟬

秋來偏爾獨知機幾處寒聲咽落暉雲樹若愁時漸晚市
塵雖到跡仍稀但餐清露甯求飽偶得閒枝欲罷飛節操
如君何太苦稻粱生性已全非

清風涼露忽成嘯林遠煙深望欲迷黃葉空山秋色裏斷
橋古渡夕陽西聲聞已接猶難見地步甯藏不肯低聽汝
去年曾醉後鬢宮松畔亦留題

偕同人過蔚千看荷

照眼花光露未乾拂雲槐蔭覆杯盤世情多爲榮枯累吾
輩從來禮法寬北海高風賓座滿炎天六月草堂寒十洲
三島誰能到對此林塘足盡歡

哭陳石閭

北宋南施次第推百年風雅久虺隤不從隆古爭雄長誰
信文壇有霸才紫氣虛瞻函谷尹大招頻上郭生臺謾言
三老遼東舊郢技空存質已摧

彭仕商字克家一字衡陬衡山人康熙辛丑進士官黃

取耳集言四卷之一
州教授有曉松吟衡陬詩

新霽

一雨逢朝旭融怡天下春飛禽還戀舊鄰樹各懷新微綠
侵書幌新紅點水蘋隔江雲出岫遠思共誰論

游方廣

羊腸峭削幾驚魂道是蠶叢闕劍門磴道棲雲晴亦溼攢
峯陷日曉猶昏陰濃古寺杉松老風起層崖虎豹尊半壁
南維天一隙朱張舊蹟許誰論

鄧牧字乃夢南豐人康熙辛丑進士官撫州教授乾隆
丙辰舉博學鴻詞

聞諸襄七在金華有述

玉堂仙人居士儔丹牀鸞鶴參遨游萬言直瀉一杯水三

顧屢迴重瞳眸竭來吳越成春秋往欲從之何緣由勞思
未已仰天笑金華山高靈草幽

梁機字仙來泰和人康熙辛丑進士由庶吉士改知縣
又改教授有北游草

仙石橋南樓夜月登眺

夜寒起暮聲潛籟入雲杪飄飄游子身眼明月華皎幽獨
移清暉飛樓託縹緲河漢流無聲驚鵲枝猶繞紆迴地脈
深蒼茫城郭小鐙火千門扃風色青煙嫋側望西山陰遠
見翠鬢宵處靜明秋毫息心遺衆擾頗聞騎驢翁雲水行
清矯孤筇倚河橋閒身契魚鳥悽愴九點塵烈風無時了
大化行一息羣生各昏曉石齒激流波咽咽仙源杳

宜陽山中雨行

亂雲不作峯急雨收薄暑危岫入高空飛電明煙炬出谷
昧歧途極目斷行旅低迷草樹暗畢逋神鴉舉四山圍一
身我今在何許冥冥失林雀驚飛慕儔侶哀哀歸澗泉幽
鳴聲相許豈不懷安居荷擔甯遑處解裝僕御來相顧不
得語暮氣何淒淒溼風吹禾黍

靈雨寺前溪

山水含清姿物色有顯晦淙淙寺前雲流出春聲內橋聚
浪花圓岸搖花影碎人情重幽遐意失當前會

峽江維舟登眺

繫纜洪流急登高晚色侵斜陽山兩岸遠水樹重陰廟鼓
江鴉集風鐙戍漏深滔滔東去浪流恨滿歸心

儲雄文字汜雲宜興人康熙辛丑進士

詩話范雲爲大雅庶常之弟昆季各以文名惟大雅
范雲兼工詩范雲少從邵青門游詩必俟青門論定
而後存故
完善者多

有訪

未遇幽人又獨還
貪看落日立溪灣
隔溪幾處炊煙動
遮斷寒林數疊山

訪朝陽道院

竹徑陰陰磬韻流
行來便覺此生浮
道人所得惟貪懶
滿地松花散不收

曉意示懷園讀書諸子兼呈家在陸先生

晨興心骨清
涉趣不暇理
桴聲劃晴窗
孤閣懸秋水
溼翠招欲來
落影在書几
故人憶園居
幽賞或同此

散帙初日上
鉤簾受荷風
心香相吐納
舌本青蓮通
能宣

圓妙諦滄海迴魚龍鼓盪薄清景秋陰結遙峯

冬日宿青門草堂

歲暮懷人意慨慷爲攜吟卷駕輕航繚垣積草餘殘雪古
木空巢自夕陽藉地牛羣爭燒影翻空鴉陣點湖光從知
眼底茫茫甚獨自扶藜立草堂

夏日侍家在陸編所自著詩古文目錄訖賦呈

一畝城隅寄陸沈雨餘山色落庭心蟲爭曉日鳴幽壁鳥
愛風潭坐綠陰繞樹編籬看引蔓臨階設榻對披襟百年
著述留盈寸誰識先生用意深

詠雪亭絕句和皆人

木落見茅茨爨煙寒未起人語一溪冰荷擔立沙嘴

江上同禮執晤方子靈皋因感百川作

才難古所歎摧折權誰司龍眠五君子

田有北國月三盛及方氏兄弟

事鍾靈奇才名三十年詎論成與隳淡澀愛百川季也情殆移忽聞百川逝臨風增悵而今始晤君舉體何清羸發言若春茗甘苦心自知哲兄竟已矣諸子空盱眙贈君加餐飯歲暮以爲期

鄧廷詰字蓼伊東莞人舉人官內閣中書有蓼園詩草

詩話蓼伊詩和平閒雅恪守嶺南三家軌範康熙五十八年充冊封安南正使刻集攜行以充羔雁想見當時皇華奉使文采風流爲承平盛事也

春田卽事

春郊芳草綠土膏初動時田家依稼穡中夜理鋤基驅犢迎晨出花村東未晞春鳩鳴曉樹落月搖桑枝鋤聲驚蟲蟄笠糾飄東菑新塍映白水漠漠光參差良苗懷秀色和

風陌上披婦姑饋饌黍依依來致詞風露欺枵腹四體毋
乃疲富貴勞益甚農夫食力微天壤無逸物日月如梭馳
暮歸雞棲埭煙火出茅茨林下較晴雨抱膝課孫兒先疇
當世守勤劬焉敢辭

村居

懶散成何事蕭蕭江上村學惟從我好貧不向人言山靜
風歸竹簾疎月到門有懷難假寐竟夕向青樽

廬山道中

雨霽林逾翠嵐開萬壑分馬嘶山澗月人踏虎溪雲竹屋
黏崖結僧田帶石耘獨憐棲隱地行役卻紛紛

甲午秋月病中作

猿鶴遙相誚田園胡不歸春風原浩蕩小草自相違壯志

那能老青山詎可非沈吟聽玉漏孤枕一鐙微

廣州謁大忠祠

忠臣遺廟肅江皋欲翦溪花薦濁醪夜半鷓鴣啼柴市血秋
深風撼海門濤卧樓氣作山河壯戰舸魂擎日月高天不
憐孤那可問佗城悵望倍蕭騷

越臺懷古

臺荒霸業幾經年曾挂炎州半壁天黃屋不歸秦日月白
雲猶蕩漢山川星涵海面浮珠影雨駕潮頭捲穗煙莫問
舊時歌舞處美人惆悵隔花田

梅嶺謁張文獻祠

古祠高倚白雲巔太息遺忠霄漢懸獨闢雄關梯海國孤
擎相業起南天讜言誰識幾先哲風度徒教身後傳向使

漁陽兵未召何勞李郭靖烽煙

姜順龍字見田號麟璧大名人舉人歷官四川按察使
有壬寅存橐

自君之出矣

自君之出矣不復理朱顏朱顏爲誰好對鏡空自憐
自君之出矣不看高樓月月缺有圓時人生長離別
自君之出矣寂寞酴醾架妾自看花開妾復看花謝
自君之出矣忍見臨歧路昔日雙車輪良人從此去